



21. august 2015

UPA 2015/48

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Inatsisartunut Naalakkersuisunullu il.il. ilaasortat aningaasarsiaqartitaanerat il.il. pillugit Inatsisartut inatsisaani § 6 imm. 6 naapertorlugu Naalakkersuisut allanngueqqullugit, Naalakkersuisut peqquneqarnissaannik Inatsisartut aalajangiiffigisassaattut siunnersuut taamaasilluni Naalakkersuisunut ilaasortat ulloq 1. januar 2016 aallarnerfigalugu Namminersorlutik Oqartussat atorfimmumut atasumik pinngitsoorani inigisassatut inigitittagaanni ineqarnermut akiliutinik naatsorsuisarnermi maleruagassat qaqugukkulluunniit atuuttut 100 %-iinik ineqarnermut akiliuteqartalersillugit.

(Inatsisartunut ilaasortaq Tillie Martinussen, Demokraatit)

Tunngavilersuut

Naalakkersuisunut ilaasortat akissarsiarissaartupilussuupput suliannut akisussaaffiannullu tulluussakkamik. Tamanna pissusissamisoorpoq tapersorsornarlunilu.

Piffisami matumani iluarsartuussiffissatsinni qularnanngitsumik innuttaasut ilaannut imaannaanngitsumik kinguneqartussamik, naapertuutissaaq politikerit siuttuugaluarpata takutillugulu pisariaqartoq allannguinernut piareersimanissaq - aamma politikerit inuttut aningaasaqarnerat eqqorneqassagaluarpalluunniit.

Ullumikkut Naalakkersuisut Namminersorlutik Oqartussat atorfimmumut atasumik inigitittagaanni ineqarnermut akiliutinik naatsorsuisarnermi maleruagassat atuuttut naapertorlugit 60 %-iinik ineqarnermut akiliuteqartinneqartarput. Tamanna aalajangersarneqarpoq Inatsisartunut Naalakkersuisunullu il.il. ilaasortat aningaasarsiaqartitaanerat il.il. pillugit Inatsisartut inatsisaani § 6 imm. 6-mi. (Aningaasarsiat pillugit inatsit).

Demokraatini kissaatigaarput tamatumap allanngortinnissaa, Naalakkersuisunut ilaasortat ulloq 1. januar 2016 aallarnerfigalugu tamakkiisumik attartornermut akiliuteqartalersillugit.



Isumaqarpugut Naalakkersuisut inigisaminnut tamakkiisumik akiliisinnaalluartut - minnerunngitsumik akissarsiaagissaarnerat eqqarsaatigalugu (aamma tunuareernerup kingorna aningaasarsiaritinneqartartut eqqarsaatigalugit) Naalakkersuisunut ilaasortat tunuarnerminni piginnartagaat.

Taamaasilluni Naalakkersuisunut ilaasortat ataasiakkaat aamma assigiinnerusumik pineqalissapput, ullumikkummi imaakkami, ilaasortat namminneq illuminni najugaqartut tapiiffigineqartaratik naak qaammammut aningaasartuutit taakkuugaluartut immaqaluunniit amerlanerusinnaasaraluartut.

Qilanaarpunga partiit allat siunnersuummut isumaasa tusarnissaanut.

Pisortanut aningaasaqarnikkut allaffissornikkullu kingunerisassai.

Namminersorlutik Oqartussat pisortatigoortumik missingersuutaanni annikitsumik sipaaruteqartoqassaaq, Naalakkersuisunut ilaasortaq siunnersuutip kinguneranik attartornermut akiliut tamaat akilertalertussaammassuk.

Inuussutissarsiornermut aningaasaqarnikkut allaffissornikkullu kingunerisassai.

Soqanngilaq.

Innuttaasunut aningaasaqarnikkut allaffissornikkullu kingunerisassai.

Soqanngilaq.